



REPUBLIKA E SHQIPËRISË
KOMISIONI I PROKURIMIT PUBLIK

Nr.3218/8 prot.

Datë 05.12.2025

V E N D I M
Nr.1801/2025

Komisioni i Prokurimit Publik, i përbërë nga:

Fiorent Zguro	Nënkryetar
Kreshnik Ternova	Anëtar
Gjergj Mersini	Anëtar
Anila Malaj	Anëtar

Në mbledhjen e datës 05.12.2025 shqyrtoi ankesën me:

Objekt: Shfuqizimi i vendimit të Komisionit të vlerësimit të ofertave mbi skualifikimin e ofertës të paraqitur nga operatori ekonomik “Avduli” SHPK, në procedurën e prokurimit “E hapur”, me Nr. REF-60564-09-08-2025, me objekt: “Përmirësimi i banesave ekzistuese për komunitetet të varfëra dhe të pafavorizuara”, me fond limit 26,108,457.00 lekë (pa tvsh), zhvilluar me datë 24.09.2025 nga autoriteti kontraktor, Bashkia Kucovë.

Ankimues: Operatori ekonomik “Avduli” SHPK, me NIPT J66703306O dhe adresë: Lagja 10 Korriku, Rruga Perlat Rexhepi, Objekt 3-katesh nr.4, Kati 1, Vlorë.

Autoriteti Kontraktor: Bashkia Kucovë me adresë Sheshi 18 Tetori, Blloku Nr 1, Lagja “Tafil Skëndo”, Kuçovë.

Baza Ligjore:

Ligji nr. 162/2020 *“Për Prokurimin Publik”* i ndryshuar, Vendimi i Këshillit të Ministrave nr. 285, datë 19.05.2021 *“Për miratimin e rregullave të prokurimit publik”*, i ndryshuar, Vendimi i Komisionit të Prokurimit Publik Nr. 766, datë 13.10.2021 *“Për miratimin e rregullave për organizimin dhe funksionimin e Komisionit të Prokurimit Publik”*, Neni 4 i Vendimit të Komisionit të Prokurimit Publik nr. 500/2020 datë 5.11.2020 *“Rregullore për Marrjen e Masave Organizative për Ushtrimin e Veprimtarisë së Institucionit të Komisionit të Prokurimit Publik gjatë gjendjes së pandemisë së shkaktuar nga COVID -19”*.

Komisioni i Prokurimit Publik, pasi shqyrtoi ankesën e paraqitur nga operatori ekonomik ankimues dhe pasi diskutoi çështjen në tërësi,

Vëren:**I***Vlerësimi paraprak*

I.1. Vlera limit e përlllogaritur për procedurën e prokurimit objekt - ankimi është mbi kufirin e ulët monetar, ndaj shqyrtimi dhe vendimmarrja do të bëhet nga të gjithë anëtarët, në përputhje me pikën 1, të nenit 30 të ligjit nr. 162/2020 *“Për prokurimin publik”*, i ndryshuar dhe Rregullat e Prokurimit Publik.

I.2. Ankimuesi ka *prima facie* interes në këtë procedurë prokurimi dhe për këtë arsye legjitimohet për të paraqitur ankesë në lidhje me të.

I.3. Operatori ekonomik ankimues ka paraqitur ankesë pranë autoritetit kontraktor dhe njëherazi pranë Komisionit të Prokurimit Publik.

I.4. Ankimuesi nuk plotëson kushtet formale të paraqitjes së ankesës pranë Komisionit të Prokurimit Publik..

II*Rrethanat e çështjes*

II.1. Në datën 09.09.2025, është publikuar në Sistemin e Prokurimeve Elektronike, procedura e prokurimit “E hapur”, me Nr. REF-60564-09-08-2025, me objekt: “Përmirësimi i banesave ekzistuese për komunitetet të varfëra dhe të pafavorizuara”, me fond limit 26,108,457.00 lekë (pa tvsh), zhvilluar me datë 24.09.2025 nga autoriteti kontraktor, Bashkia Kucovë.

II.2. Në datën 24.09.2025, autoriteti kontraktor zhvilloi procedurën e prokurimit objekt - ankimi.

II.3. Nga verifikimi në sistemin e prokurimit elektronik (SPE), si dhe referuar informacionit të autoritetit kontraktor të dorëzuar pranë Komisionit të Prokurimit Publik, autoriteti kontraktor në datën 21.10.2025, ka kryer vlerësimin e ofertave të operatorëve ekonomikë pjesëmarrës në këtë procedurë prokurimi, të cilët kanë paraqitur ofertat ekonomike (pa TVSH), përkatësisht:

1. 3 V - PASHO	24 345 555 lekë	Kualifikuar
2. AVDULI	22 020 105 lekë	Skualifikuar

II.4. Operatori ekonomik “AVDULI” SHPK rezulton i skualifikuar nga procedura e prokurimit për arsyet si më poshtë: *“Nuk plotëson pikën 2.3.8 të DST-së , pasi nga verifikimi I dokumentacionit të dorëzuar nga ana e OE me shkresën Nr.113 Prot., datë 10.10.2025, protokolluar në tonën me Nr.3568Prot., datë 10.10.2025 , rezulton se nga ana e AK është kërkuar që operatori ofertues për realizimin me sukses të kontratës duhet të disponoj nder të tjera dhe autobetoniere kantieri, ndersa nga ana e operatorit ekonomik është dorëzuar dokumentacion që disponon një autobetoniere me targa AA 316 DS me ane të kontratës së qirasë me Nr.Rep.728Nr.Kol278 , e cila nuk është autobetoniere kantieri , dhe gjithashtu ka deklaruar që disponon nje kamion me vinç, nderkohe nga dokumentacioni I dorëzuar OE ka parqitur një kamion me targa AA 251 OM anë të kontratës së qirasë me nr.Rep.893 nr.kol.343 I cili nuk është një kamion me vinç, Gjithashtu OE ka deklaruar se diponon nje eskavator me goma me targa ALMT72 , nga verifikimi I dokumentacionit të dorëzuar nga ana e OE, rezulton se është fadrome dhe jo eskavator me goma.*

Nuk plotëson pikën 2.3.4 të DST-së , pasi nga verifikimi I dokumentacionit të dorëzuar nga ana e OE me shkresën Nr.113 Prot., datë 10.10.2025, protokolluar në tonën me Nr.3568Prot., datë 10.10.2025 , rezulton se OE ka dorëzuar kontrata e punës e lidhur me date 01.10.2024 midis “AVDULI” sh.p.k dhe teknikut mekanik Z.Eridjan Osmenaj me një pagë 10000 (dhjete mije) leke , kjo ne kundershiti me VKM 113, datë 01.03.2023, “Për përcaktimit e pagës minimale në rang vëndi”, OE ka dorëzuar kontrata e punës e lidhur me date 01.10.2024 midis “AVDULI” sh.p.k dhe elektrikistit Z.Vleran Maksutaj me një pagë 10000 (dhjete mije) leke , kjo ne kundershiti me VKM 113, datë 01.03.2023, “Për përcaktimit e pagës minimale në rang vëndi”, OE ka dorëzuar kontrata e punës e lidhur me date 01.10.2024 midis “AVDULI” sh.p.k dhe karpentierit Z.Josif Gjonedaj me një pagë 10000 (dhjete mije) leke , kjo ne kundershiti me VKM 113, datë 01.03.2023, “Për përcaktimit e pagës minimale në rang vëndi, OE ka dorëzuar kontrata e punës e lidhur me date 01.10.2024 midis “AVDULI” sh.p.k dhe manovratorit Z.Sihat Kapaj me një pagë 10000 (dhjete mije) leke , kjo ne kundershiti me VKM 113, datë 01.03.2023, “Për përcaktimit e pagës minimale në rang vëndiOE ka dorëzuar kontrata e punës e lidhur me date 01.10.2024 midis “AVDULI” sh.p.k dhe Muratorit Z.Pajtim Çobaj me një pagë 10000 (dhjete

mije) leke , kjo ne kundërshtim me VKM 113, datë 01.03.2023, “Për përcaktimit e pagës minimale në rang vëndi.

II.5. Në datën 05.11.2025, autoriteti kontraktor ka publikuar Njoftim-Fituesi paraprak në sistemin e prokurimeve elektronike, për procedurën e prokurimit objekt-ankimi.

II.6. Në datën 10.11.2025 nëpërmjet Sistemit të Ankesave Elektronike, njëherazi pranë Komisionit të Prokurimit Publik dhe autoritetit kontraktor, është administruar ankimi elektronik me nr. A/2025/6063 dhe nr.3218/2025 prot, datë 11.11.2025 i operatorit ekonomik “Avduli” SHPK, në procedurën e prokurimit “E hapur”, me Nr. REF-60564-09-08-2025, me objekt: “Përmirësimi i banesave ekzistuese për komunitetet të varfëra dhe të pafavorizuara”, me fond limit 26,108,457.00 lekë (pa tvsh), zhvilluar me datë 24.09.2025 nga autoriteti kontraktor, Bashkia Kucovë, duke kundërshtuar vendimin e Komisionit të Vlerësimit të Ofertave lidhur me skualifikimin e ofertës së paraqitur prej tij në procedurën e sipërpërmendur të prokurimit.

II.7. Në përputhje me nenin 112 “Veprimet paraprake” të Ligjit nr.162/2020 “Për Prokurimin Publik”, i ndryshuar Komisioni i Prokurimit Publik me marrjen e ankesës, e publikoi atë në bazën e të dhënave të tij, e cila përmban të dhëna për: a) ankimuesin, adresën dhe NUIS-in; b) të dhëna të plota për procedurën e prokurimit (objekt, numër reference, fond limit, datën e zhvillimit të procedurës), si dhe publikoi formularin e publikimit nr.3218/1 prot, datë 12.11.2025, lidhur me arsyet e skualifikimit të operatorit ekonomik “Avduli” SHPK, në procedurën e prokurimit objekt-ankimi.

II.8.. Nëpërmjet sistemit të ankesave elektronike, autoriteti kontraktor në datën 21.11.2025 ka përcjellë vendimin e Komisionit të Shqyrtimit të Ankesave nr.38, datë 21.11.2025, protokolluar me tonën me nr.3218/2, datë 25.11.2025, lidhur me ankesën e operatorit ankimues “Avduli” SHPK. Referuar vendimit të KSHA rezulton se ky i fundit ka vendosur refuzimin e ankesës së ankimuesit si të paparaqitur, si më poshtë vijon:

[...] Referuar arsyetimit, në kushtet kur operatori ekonomik ankimues nuk ka paguar tarifën financiare të ankesës si dhe ka refuzuar ndreqjen e të metave sipas parashikimeve të pikës 3 të nenit 111 të ligjit nr. 162/2020 “Për prokurimin publik”, Personi përgjegjës për administrimin e procedures së prokurimit përkatës, vlerëson se ankesa e operatorit ekonomik "AVDULI" shpk nuk plotëson një prej elementeve të domosdoshme për shqyrtimin e ankesës, dhe për rrjedhojë ajo vlerësohet si e paparaqitur.

Nisur nga sa më sipër, në bazë të nenit 102, pika 1 gërma "c" të Vendimit Nr.285 të Këshillit të Ministrave dt.19.05.2021 "Për Miratimin e Rregullave të Prokurimit Publik", si dhe të nenit 114, pika 3, gërma c) të ligjit Nr 162 datë 23.12.2020 "Për Prokurimit Publik:

VENDOS:

Të refuzojë ankesën e operatorit ekonomik “Avduli” SHPK si e paparaqitur për procedurën e prokurimit prokurimit “E hapur”, me Nr. REF-60564-09-08-2025, me objekt: “Përmirësimi i

banesase ekzistuese për komunitetet të varfëra dhe të pafavorizuara”, me fond limit 26,108,457.00 lekë (pa tvsh), zhvilluar me datë 24.09.2025 nga autoriteti kontraktor, Bashkia Kucovë.

II.9. Vendimin e Komisionit të Shqyrtimit të Ankesave nr.38, datë 21.11.2025, autoriteti kontraktor e ka përcjellë pranë Komisionit të Prokurimit Publik edhe nëpërmjet shërbimit postar, protokolluar me tonën me nr.3218/3 prot., datë 21.11.2025.

II.10. Nga verifikimet e materialeve të fashikullit të shqyrtimit administrativ rezulton se statusi i pagesës për ankesën me numër 3218 prot., datë 11.11.2025 rezulton **“Paparaqitur mandat pagesë”**.

II.11. Nga verifikimi në Sistemin Elektronik të Ankesave, konstatohet se, autoriteti kontraktor në datë 17.11.2025 i është drejtuar operatorit ekonomik ankimues “Avduli” SHPK me kërkesë për plotësimin e të metave të ankesës brenda dy ditëve, që në rastin konkret konsiston në dokumentin bankar që vërteton pagesën e tarifës financiare për depozitimin e ankesës.

II.12. Me qëllim vijim e shqyrtimit të mëtejshëm të ankesës nga KPP me shkresën nr.3218/4 prot., datë 27.11.2025 ju kërkuar informacion Sektorit të Financës mbi statusin aktual të pagesës për ankesën objekt shqyrtimi.

II.13.Me shkresën nr 3218/5 prot., datë 05.12.2025, lidhur me kërkesën e bërë për statusin e ankesës së operatorit ekonomik “Avduli” SHPK, Sekori i Financës informon se: “ [...] Për ankesën me nr.3218/2025 prot., datë 11.11.2025, me numër aplikimi elektronik A/2025/6063, Operatori ekonomik “Avduli” PF, nuk ka paraqitur dokument në seksion mandat pagese. Në vijim të shkresës tuaj janë kryer verifikime me raportin e datës 04.12.2025 të dërguar nga Dega e Thesarit për arkëtimet e muajit Nëntor, ku rezulton se Operatori ekonomik “Avduli” PF nuk ka kryer pagesë për ankesën e sipërcituar në favor të Komisionit të Prokurimit Publik”.

III

Komisioni i Prokurimit Publik

pas shqyrtimit të ankesës, dokumentacionit bashkëngjitur kësaj ankese,

Arsyeton:

III.1.Lidhur me ankesën e administruar në datën 11.11.2025 nëpërmjet sistemit elektronik të ankesave nga operatorit ekonomik “Avduli” SHPK, me nr. ankimi elektronik A/2025/6063 dhe nr.3218/2025 prot, datë 11.11.2025 i operatorit ekonomik “Avduli” SHPK, në procedurën e prokurimit “E hapur”, me Nr. REF-60564-09-08-2025, me objekt: “Përmirësimi i banesase

ekzistuese për komunitetet të varfëra dhe të pafavorizuara”, me fond limit 26,108,457.00 lekë (pa tvsh), zhvilluar me datë 24.09.2025 nga autoriteti kontraktor, Bashkia Kucovë, mbi kundërshtimin e vendimmarrjes së Komisionit të Vlerësimit të Ofertave mbi skualifikimin e ofertës të paraqitur prej tij, Komisioni i Prokurimit Publik konstaton, se operatori ekonomik ankimues nuk ka kryer pagesën e tarifës financiare për ankesën e mësipërme, në përputhje me përcaktimet në nenin 111, të ligjit nr. 162/2020 “Për prokurimin publik”, i ndryshuar ku parashikohet se:

“1. Operatori ekonomik ankimues dërgon njëkohësisht ankesën në autoritetin ose entin kontraktor dhe Komisionin e Prokurimit Publik në Sistemin e Ankesave Elektronike. Rregulla të posaçme për mënyrën e paraqitjes së ankesës përcaktohen në rregullat e prokurimit publik.

2. Ankesa bëhet sipas formularit përkatës, ku shënohen emri dhe adresa e ankuesit, referimi për procedurën konkrete dhe bazën ligjore, ku ankuesi pretendon për shkeljet, pagesa e tarifës së ankesës, duke e shoqëruar atë me dokumentacionin dhe provat përkatëse, për të cilat mendon se mbështesin ankimin e tij. Elementet e sipërpërmendura janë të domosdoshme për shqyrtimin e ankesës. Ankimesi është i detyruar t'i bashkëlidhë ankimit dokumentin bankar që vërteton pagesën e tarifës përkatëse për ankesën.

3. Nëse mungon ndonjë nga elementet e sipërpërmendura ose formulari nuk është plotësuar në mënyrën e duhur, atëherë autoriteti ose enti kontraktor duhet të vërë në dijeni ankimesin për të plotësuar formularin. Njoftimi mund të bëhet me çdo mjet të mundshëm, përfshirë edhe postën elektronike, dhe në çdo rast dokumentohet. Nëse ankesa nuk korrigjohet brenda 2 ditëve nga njoftimi, ajo vlerësohet si e paparaqitur.

4. Në çdo rast, paraqitja e ankesës shoqërohet me mandatpagesën e bërë pranë Komisionit të Prokurimit Publik.”

III.1.1. Në gërmën “a” të pikës 2 të nenit 118 të ligjit nr. 162/2020 “Për prokurimin publik”, i ndryshuar, është parashikuar se: *“2. Përpara lidhjes së kontratës, Komisioni i Prokurimit Publik ka të drejtë: a) të refuzojë ankesën për shkak të mosplotësimit të elementeve të domosdoshme për shqyrtimin e saj dhe mosrespektimit të afateve të ankimit, sipas parashikimeve të neneve 110 dhe 111 të këtij ligji”.*

III.1.2. Nëpërmjet sistemit të ankesave elektronike, autoriteti kontraktor në datën 21.11.2025 ka përcjellë vendimin e Komisionit të Shqyrtimit të Ankesave nr.38, datë 21.11.2025, protokolluar me tonën me nr.3218/2, datë 25.11.2025, lidhur me ankesën e operatorit ankimues “Avduli” SHPK. Referuar vendimit të KSHA rezulton se ky i fundit ka vendosur refuzimin e ankesës së ankimesit si të paparaqitur, për shkak të moskorrigjimit të të metave të ankesës nga operatori ekonomik ankimues,

III.1.3. Referuar pikës 2 të nenit 111 të LPP-së, i ndryshuar, Komisioni thekson, se ligjvënësi ka përcaktuar disa elemente të domosdoshme formale për paraqitjen e ankesës, njëkohësisht pranë Komisionit të Prokurimit Publik dhe autoritetit kontraktor. Një prej elementeve të domosdoshme për paraqitjen e ankesës është edhe dokumenti bankar, që vërteton pagesën e tarifës përkatëse

për ankesën. Ndërsa referuar pikës 3 të nenit 111 të LPP-së, i ndryshuar, Komisioni gjykon, se ligjvënësi i ka dhënë një mundësi ankimuesve, që të korrigjojnë ankesat e tyre në rast se konstatohet mungesa e një apo më shumë elementeve formale të përcaktuara në pikën 2 të nenit 111 të LPP-së, i ndryshuar. Me anë të kësaj mundësie, ligjvënësi ka dashur të përcjellë frymën, se nuk mund t'i refuzohet e drejta e ankimit subjekteve që pretendojnë se dëmtohen ose rrezikojnë të dëmtohen nga një vendimmarrje e autoritetit kontraktor në mënyrë apriori, vetëm për shkak të disa mungesave formale, të cilat mund të korrigjohen lehtësisht brenda një afati të arsyeshëm, që nuk cenon parimin e efikasitetit në procedurat e prokurimit publik. Bazuar në dispozitën e mësipërme, për të konstatuar mungesat lidhur me elementet formale të ankesës, si dhe për të vënë në dijeni ankimuesin lidhur me mungesat e konstatuara, është detyrim i autoritetit kontraktor, i cili duhet të njoftojë menjëherë ankimuesin me çdo mjet të mundshëm, duke i lënë 2 ditë kohë për të korrigjuar elementet e domosdoshme formale të ankesës.

Referuar informacionit të autoritetit kontraktor të depozituar në KPP, vendimit të Komisionit të Shqyrtimit të Ankesave nr.38, datë 21.11.2025, protokolluar me tonën me nr.3218/2, datë 25.11.2025, lidhur me ankesën e operatorit ankimues “Avduli” SHPK, rezulton, se autoriteti kontraktor ka zbatuar përcaktimet e bëra nga ana e ligjvënësit në pikën 3 të nenit 111 të LPP-së, i ndryshuar, duke respektuar hapat proceduralë që parashikon kjo dispozitë ligjore, sepse përmes sistemit të ankesave elektronike (SAE) i ka kërkuar operatorit ekonomik “Avduli” SHPK, ndreqjen e të metave të ankesës, në rastin konkret kryerjen e pagesës së tarifës për ankesën e paraqitur pranë autoritetit kontraktor.

Komisioni i Prokurimit Publik thekson faktin, se përcaktimi i procedurave të caktuara në LPP dhe Rregullat e Prokurimit Publik, duke filluar nga përgatitja e ofertës, shqyrtimi i ofertave, ankimi, si dhe mundësia për të korrigjuar mangësitë lidhur me elementet e domosdoshme formale të ankesës, përfaqësojnë garanci dhe siguri juridike për palët e interesuara. Parimi i ligjshmërisë është ndër parimet kryesore të veprimtarisë së organeve të administratës publike. Gjithashtu, ndër parimet kryesore të zhvillimit të procedurave të prokurimit, parashikuar nga lex specialis LPP, janë ato të mosdiskriminimit, transparencës dhe barazisë. Tërësia e elementeve të mësipërme, lidhet ngushtësisht me elemente të ligjshmërisë së vendimeve të organeve të administratës publike.

Komisioni Prokurimit Publik, konstaton se autoriteti kontraktor ka njoftuar (më datë 17.11.2025) operatorin ekonomik ankimues “Avduli” SHPK përmes SAE, në lidhje me korrigjimin e mangësive të konstatuara në lidhje me elementet formale të ankesës, konkretisht pagesës së tarifës së ankesës. Gjithashtu me shkresën nr 2813/5 prot., datë 05.12.2025, lidhur me kërkesën e bërë për statusin e ankesës së operatorit ekonomik “Avduli” SHPK, Sekori i Financës informon se: “ [...] Për ankesën me nr.3218/2025 prot., datë 11.11.2025, me numër aplikimi elektronik A/2025/6063, Operatori ekonomik “Avduli” PF, nuk ka paraqitur dokument në seksion mandat pagese. Në vijim të shkresës tuaj janë kryer verifikime me raportin e datës 04.12.2025 të dërguar nga Dega e Thesarit për arkëtimet e muajit Nëntor, ku rezulton se **Operatori ekonomik “Avduli” PF nuk ka kryer pagesë për ankesën e sipërcituar në favor të Komisionit të Prokurimit Publik.**

Sa më sipër, konstatohet se ankimuesi nuk ka paguar tarifën financiare të ankesës në përputhje me përcaktimet e pikës 2 të nenit 111 të ligjit nr. 162/2020 “Për prokurimin publik”, i ndryshuar duke mos plotësuar kështu një prej elementeve të domosdoshme për shqyrtimin e ankesës.

Sa më sipër argumentuar, Komisioni i Prokurimit Publik vlerëson se, për sa kohë ankesa e paraqitur nga operatori ekonomik ankimues nuk plotëson kushtet formale, siç është pagesa e tarifës, duhet refuzuar.

Për sa më sipër, në mbështetje të neneve 30, dhe 118 të ligjit nr. 162/2020 “Për Prokurimin Publik”, i ndryshuar Vendimit të Këshillit të Ministrave nr. 285, datë 19.05.2021 “Për miratimin e rregullave të prokurimit publik”, i ndryshuar, Vendimit të Këshillit të Ministrave nr. 236, datë 20.04.2023 “Për përcaktimin e rregullave dhe tarifës së pagesës për ankimin në një procedurë prokurimi pranë Komisionit të Prokurimit Publik”, Vendimit të Komisionit të Prokurimit Publik Nr. 766, datë 13.10.2021 “Për miratimin e rregullave “Për Organizimin dhe Funksionimin e Komisionit të Prokurimit Publik”, nenit 4, të Vendimit të Komisionit të Prokurimit Publik nr. 500/2020 datë 5.11.2020 “Rregullore për Marrjen e Masave Organizative për Ushtrimin e Veprimtarisë së Institucionit të Komisionit të Prokurimit Publik gjatë gjendjes së pandemisë së shkaktuar nga COVID -19”, Komisioni i Prokurimit Publik, njëzëri,

Vendos

1. Të mos pranojë ankesën e paraqitur nga operatori ekonomik “Avduli” SHPK, në procedurën e prokurimit “E hapur”, me Nr. REF-60564-09-08-2025, me objekt: “Përmirësimi i banesave ekzistuese për komunitetet të varfëra dhe të pafavorizuara”, me fond limit 26,108,457.00 lekë (pa tvsh), zhvilluar me datë 24.09.2025 nga autoriteti kontraktor, Bashkia Kucovë.
 2. Autoriteti kontraktor lejohet të vijojë me hapat e mëtejshëm të procedurës së prokurimit.
 3. Kundër këtij vendimi mund të bëhet ankim në Gjykatën Administrative të Apelit.
 4. Kopje e këtij vendimi i dërgohet për njoftim Agjencisë së Prokurimit Publik.
- Ky vendim hyn në fuqi menjëherë.

KOMISIONI I PROKURIMIT PUBLIK

Anëtar
Anila Malaj

Anëtar
Kreshnik Ternova

Anëtar
Gjergj Mersini

Nënkryetar
Fiovent Zguro

